



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Antonii Mariae Gratiani A Burgo S. Sepulchri Episcopi  
Amerini De Vita Joannis Francisci Commendoni Cardinalis  
Libri Quatuor**

**Graziani, Antonio Maria**

**Parisiis, 1669**

Cap. X. De profectione ejus in Belgas.

**urn:nbn:de:hbz:466:1-9616**

Commendono, ut suo nomine optare siquidem id, atque pernelle Julio diceret. His actis, eadem nocte consensis, & crebro mutatis equis, Romam rediit, cum Julius vixdum venisse cum Urbinum existimaret.

*De profectione ejus in Belgas.*

C A P U T X.

**D**ISSIDENTIBUS, vt dictum est, atroci-  
bus inter se odiis Cæsare, atque Henrico  
Galliæ Rege, ac exitiabili bello Christianam Rem-  
publicam dilacerantibus, Julius, quod sui in pri-  
mis officiis erat, de componendis Regum con-  
troversiis, reducendisque in gratiam eorum ani-  
mis, Hieronymum Dandinum paulo antè à se in  
amplissimum Collegium cooptatum, ac tam præ-  
cipuâ apud Pontificem gratiâ, atque auctoritate  
florentem, Legatum ad Cæsarem misit. Is Com-  
mendonum, cuius antè ingenium nonnullâ ejus  
confuetudine probatum, perspectumque habebat,  
secum ducere cupivit, impetravitque à Julio. Ce-  
leriter juvenis gravitate, & modestiâ morum, &  
omni officiorum humanitate cum cæteris carus,  
jucundusque, tum longè acceptissimus Legato ha-  
beri est cœptus, atque intimis quoque consiliis  
adhiberi: Itaque ad Cæsarem cum venisset, &  
nunciata paulò post Edoardi Britannorum Regis  
mors esset, in Britanniam ab eo est missus: de

E

qua profectione priusquam dicamus, causam pau-  
lo altius ab origine repetere operæ pretium fue-  
rit. Henricus Octavus cùm duodetriginta annos  
Catherinam Ferdinandi Regis Hispaniæ filiam,  
Caroli Cæsaris materteram in matrimonio ha-  
buisset, filiosque ex ea suscepisset, seu deflore-  
scens ætatis ejus, vergentisque ad senium per-  
tæsus, sive alterius amore ab illa alienatus, ad cu-  
piditatem ejus repudiandæ impotenti animo in-  
cubuerat, effrenatæque libidini, quâ præceps fe-  
rebatur, causam prætexebat, quòd Catherina an-  
tè Arturo fratri suo nupta fuisset, qui quartum-  
decimum annum agens intactam puellam relin-  
quens morbo decesserat; & virgo petentibus eni-  
xè Regibus patre, ac socero ex auctoritate Julii  
II. Pont. Max. tradita Henrico fuerat. Cùm Ro-  
mæ, vt matrimonium, quod sibi non justum  
cum Catherina esse aiebat, dirimeretur, impe-  
trare nequisset, amens cupiditate, ac fcelere,  
spreto Pontifice Maximo, abjectoque religionis,  
& facrorum respectu, omni divinarum, atque hu-  
manarum legum jure contempto, exacta thoro, &  
conjugio suo Catherina, Annam Bolenam, quam  
perditè deperibat, vxorem duxit, & à Pontificum  
Maximorum fide desciscens, penitus se, regnum  
que à Catholicæ Ecclesiæ corpore præscidit; eun-  
démque se summum in suo regno facrorum An-  
tistitem appellavit. Quo facto veluti perrupto  
aggere omnis ille pravissimarum opinionum, hæ-  
refumque oceanus Angliam inundavit. Unde

tanti, ac tam sœvi seditionis æstus, tot monstrorum species prodierunt, frustra obnitente, & acribus suppliciis auctores coercente Henrico. Moriens inde Edoardum filium tertia uxore suscepit successorem Regni reliquit, puerum indolis probæ, sed adeò à tutoribus, rectorib[us]que in sacrorum disciplina corruptum, ut vna illi religio fuerit veræ religionis fundamenta evertere, funditusque eruere. Verùm is seu morbo, seu fraude suorum intra xvii. ætatis annum extinctus, Regnum, exclusa Mariâ sorore, Joannæ consobrinæ suæ filiæ testamento reliquit. Hanc Dudleus Nortumbriæ Dux summam s[ecundu]m Edoardo potentiam adeptus, nurum sibi adsciverat, instrumentumque transferendi in domum suam Regni habebat; sed Maria, cognitâ fratris morte, haudquam segniter ad vindicandum jus suum exurexerat, proiectaque ingenti popularium favore, paucis diebus paternum Regnum recepit; & quod alterius Regni instar fuit, Nortumbrius ipse, & Joanna, & maritus Guilfordius in potestatem ejus venere. Nam Nortumbrius palam factâ morte Edoardi, quam ipse dum destinata disponit, triduum occultaverat, cùm testamentum Principibus coram aperuisset, ex eoque Joannam nurum Reginam nuncupasset, ac deductam in Londonensem arcem, vt mos genti, in possessione Regni locasset; nuntiis mox de Maria allatis, de promptâ Regiis thesauris pecuniâ, ac magnâ largitione militibus sibi, vt rebatur, firmatis, cele-

E ij

riter copias adversus Mariam eduxerat, vt antè eam oppimeret, quād ad convalescendum spatiū haberet. Sed tanta repente ad Mariam animorum facta inclinatio est, vt non destituerint modò Nortumbrium milites, sed custodiā circumdatum Reginæ tradiderint. Maria justo, quamquam infelici Catherinæ, & Henrici matrimonio erat nata, ac primā ætate, cùm frater eādem matre genitus intra infantiam mortem obiisset, non regio solū cultu, regisque opibus innutrita fuerat, sed vnicè dilecta parentibus, etiam in non dubiam spem Regni educata, nuptiæque ejus maximis Europæ Regibus sunt appetitæ. Quā fortunā adeò post repudiata matrem, prolapsūmque ad flagitia, & scelera patrem decidit, vt ex auctoritate ejus, de sanctioris consilii sententia hæreditatis, ac successionis in paternum Regnum jure privata, ancillaribus ministeriis Henrici pellicibus famulari cogeretur. Nec post patris mortem honoratior apud Edoardum fratrem fuerat, abjecta, spretaque, ac procul Regia habita, magis divinā ope, quād cautione, & custodia sua Nortumbrii fraudes variè vitæ ejus insidiantis, vitaverat. Fuit enim innocentissima fœmina, & pari Catholicæ religionis constantiā, & vitæ sanctitate, vt nihil adepta Regnum habuerit prius, quād patris, fratrisque leges adversus iura sacrorum latus abrogare, ac pristinum pietatis cultum restituere, usque adeò in id intento studio, vt monenti Carolo Cæsari consilium ne ap-

properaret, neve tam immaturis rebus sese indicaret, responsum sanè memorabile reddiderit: Sedum deserta, destitutaque in sua calamitate jacceret, non alterius spe, atque ope, quam Dei sustentatam, ad Regnum inde proiectam fuisse: Itaque statutum sibi, cui salutem, & dignitatem deberet, ei non cunctanter, aut obscurè, sed statim, ac propalam gratiam profiteri. Nec quia ob id crebræ eam seditiones, tumultusque quorundam, qui omnium rerum licentiae, ac impunitati assueti, ac propè omni religione soluti ægrè sub jugum suave, ac salubre Christianæ disciplinæ redibant, exceperunt, destitit incepto; sed punitis fortiter auctoribus, ac multitudine ad sanitatem reductâ, eximia cum gloria & Regnum pacavit, & colendæ pietatis rationem constituit.

*De ejus in Britanniam adventu, & actis  
ibi per eum.*

## C A P U T X I.

**V**ERUM, vt vnde transgressi paulum seriem rerum, temporisque sumus, eo revertamur in continentem post nuncium extinti Edoardi nihil nisi itum ad arma ab Nortumbrio, & gentem Mariæ studere incertis rumoribus afferebatur. Nam ardente inter Gallos, & Cæsarem bello omnia plena suspicionum erant, omnia littora,

E iij